



*Rabu, 2 Februari 2022*

**Ogen: Ezeziel 25:12-14**



**PAGITNA PEMBALASENKU**



Moab ras Edom, enda dua negri si mbelin si lit deherken tanah Israel. Bali ras Moap, Edom pe inubuatken ndatken kesusaan, si mesangat erkiteken pembalasan Tuhan kenca Israel mulih i bas tawanan nari. Engkai maka nembek kal ate Tuhan man bangsa e, she maka adi sioge cukup kejam pembalasan si ibahan Tuhan man bangsa enda? Ibunuh kerina anakna dilaki, rubia-rubiana bage pe kuta-kutana ikernepeken, janah rakyatna kerina inubuatken mate kerina. Janah adi erpalasken sejarah bangsa enda, maka kerina bangsa Edom nggo merap marpar, kuta Moap jine pe nggo jadi sikerajangen bangsa sideban seh asa gundari.

Bangsa Edom enda, situhuna sekutu, teman sekerja Israel i bas pertahanan negara, tapi nukah kal mobah ukurna, piga-piga kali erpekat ia ras Moab guna nidingi bangsa Israel. Megati pe ia jadi penyusup ku tengah bangsa Israel guna ngeteh kai rahasia e maka arah e iserangna pe bangsa e. Banci i istilahken tempa-tempa rusur bangsa e jadi musuh dalam selimut man bangsa Israel. Kenca ndabuh bangsa Israel ndai ku bas tan Babil ras Asyur meriah kal ukurna (Mzm.137:7). Banci ikataken bangsa Edom enda me percian, persegat janah erelem-elem. Tentuna la lit si mehuli si man arapenken i bas ia nari, e maka tupung idahna pe bangsa Israel ibunuhi labo lit sura-surana nampati.

Bangsa Edom gambaren kalak si pekulak-kulah. Kalak percian si tempa-tempa mehuli tapi tawa ia i babo kiniseran kalak sideban. Kalak si bage la lit si mehuli i bas ia. Labo man deheren, labo man turinken rahasia man bana. Janah adi lit biakta bage, sibenterkenlah minter. Nembek kal ate Tuhan. Sabap labo ngena ateNa kalak pekulak-kulah, i bas babahna mehuli tapi jahat sura-surana. Mesui kal ateta adi nggo seh pagitna pernembek ate Tuhan e, labo man banta ngenca tapi terus ku kesusurenta.

☞ Tuhan e mbelin keleng ateNa, tapi tetap ukumna kalak si ersalah



*[The main body of the page is a large, blank white area with a wavy top edge, intended for writing.]*